

Embargo: Hanya boleh diterbitkan atau disebarikan mulai jam 1200, Khamis, 11 September 2025



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

INDEKS PENGELUARAN PERINDUSTRIAN MALAYSIA JULAI 2025

Indeks Pengeluaran Perindustrian Malaysia bertambah baik kepada 4.2 peratus pada Julai 2025, dipacu oleh pengembangan dalam sektor Pembuatan dan Perlombongan

PUTRAJAYA, 11 SEPTEMBER 2025 – Indeks Pengeluaran Perindustrian bertambah baik kepada 4.2 peratus tahun ke tahun pada Julai 2025, dipacu oleh pengembangan dalam sektor Pembuatan dan Perlombongan. Jabatan Perangkaan Malaysia (DOSM) melaporkan dalam keluaran **Indeks Pengeluaran Perindustrian (IPP), Malaysia, Julai 2025** pada hari ini. Penerbitan ini memaparkan statistik IPP yang terdiri daripada tiga sektor iaitu Perlombongan, Pembuatan dan Elektrik.

Mengulas laporan tersebut, Dato' Sri Dr. Mohd Uzir Mahidin, Ketua Perangkawan Malaysia berkata, "Indeks Pengeluaran Perindustrian meningkat 4.2 peratus pada Julai 2025 selepas merekodkan pertumbuhan sederhana 2.9 peratus pada bulan sebelumnya. Pengembangan ini disokong terutamanya oleh sektor Pembuatan yang meningkat 4.4 peratus (Jun 2025: 3.6%), sementara sektor Perlombongan memulih kepada 4.3 peratus (Jun 2025: -0.01%). Selain itu, sektor Elektrik bertumbuh sebanyak 1.6 peratus, kekal positif walaupun pada kadar yang lebih perlahan berbanding 2.3 peratus pada Jun 2025. Perbandingan dengan bulan sebelumnya, IPP menurun mencatatkan pertumbuhan negatif 0.3 peratus, berbeza dengan pertumbuhan positif 7.5 peratus yang direkodkan pada bulan sebelumnya."

Ketua Perangkawan mengulas lanjut, “Peningkatan dalam output Pembuatan pada Julai 2025 disokong oleh pengeluaran yang lebih tinggi dalam industri berorientasikan eksport iaitu sebanyak 4.1 peratus berbanding 2.9 peratus yang direkodkan pada Jun 2025. Kenaikan tersebut diterajui terutamanya oleh Pembuatan komputer, produk elektronik & optikal; dan Pembuatan jentera & peralatan t.t.t.l. yang mencatatkan peningkatan masing-masing sebanyak 8.5 peratus dan 10.2 peratus. Tambahan lagi, Pembuatan perabot juga mengalami lonjakan sebanyak 11.1 peratus pada bulan tersebut. Pengembangan tahun ke tahun ini adalah selari dengan prestasi eksport barangan perkilangan negara yang bertambah baik dengan mencatatkan pertumbuhan negatif yang lebih kecil iaitu 1.5 peratus pada Julai 2025. Perbandingan bulan ke bulan, industri berorientasikan eksport jatuh 2.2 peratus berbanding pertumbuhan positif 11.9 peratus pada Jun 2025.

Sementara itu, industri berorientasikan domestik kekal stabil pada 5.0 peratus berbanding peningkatan 5.1 peratus yang direkodkan pada Jun 2025. Pertumbuhan berterusan ini disumbangkan oleh momentum positif yang direkodkan dalam kesemua subsektor kecuali bagi Pembuatan kertas & produk kertas yang mencatatkan penurunan 2.1 peratus pada Julai 2025. Pembuatan pengeluaran berkaitan aktiviti pembinaan iaitu Pembuatan logam asas; dan Pembuatan produk logam yang direka, kecuali mesin & kelengkapan masing-masing meningkat 7.4 peratus dan 4.1 peratus. Berbanding bulan Jun 2025, industri berorientasikan domestik meningkat 1.0 peratus berbanding negatif 3.1 peratus yang dicatatkan pada bulan sebelumnya.”

Dato' Sri Dr. Mohd Uzir Mahidin menambah, “Pengeluaran sektor Perlombongan pada Julai 2025 meningkat 4.3 peratus disokong oleh kenaikan dalam kedua-dua komponen iaitu indeks Minyak Mentah & Kondensat pulih 1.0 peratus (Jun 2025: -3.2%), diikuti oleh indeks Gas Asli yang terus berkembang 6.8 peratus (Jun 2025: 2.3%). Berbanding bulan sebelumnya, indeks Perlombongan menyederhana kepada positif 2.2 peratus, lebih rendah daripada pertumbuhan positif 15.8 peratus yang direkodkan pada Jun 2025. Sementara itu, penjanaan Elektrik bertumbuh 1.6 peratus tahun ke tahun pada Julai 2025 (Jun 2025: 2.3%). Perbandingan bulan ke bulan, indeks Elektrik memulih kepada positif 5.5 peratus (Jun 2025: -4.6%).”

Melihat kepada prestasi beberapa negara lain, IPP terus meningkat termasuk Amerika Syarikat (1.4%), Korea Selatan (5.0%) dan Vietnam (11.8%). Sebaliknya, Jepun dan Thailand masing-masing mengalami kemerosotan 0.9 peratus dan 4.0 peratus pada Julai 2025.

Merumuskan kenyataannya mengenai prestasi IPP bagi tujuh bulan pertama tahun 2025, Ketua Perangkawan berkata, “IPP bertumbuh pada kadar lebih sederhana iaitu 2.4 peratus berbanding tempoh yang sama tahun sebelumnya (Januari - Julai 2024: 4.0%) dipengaruhi oleh indeks Pembuatan (4.1%). Sebaliknya, indeks Perlombongan dan indeks Elektrik masing-masing merekodkan penurunan 3.2 peratus dan 0.4 peratus.”


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 197 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Carta 1: Indeks Pengeluaran Perindustrian, Malaysia, Julai 2024 - Julai 2025




Carta 2: Indeks Pengeluaran Perindustrian dan Komponennya, Malaysia Julai 2024 - Julai 2025




**Carta 3: Pertumbuhan Indeks Pembuatan Mengikut Subsektor, Malaysia
Jun 2025 dan Julai 2025**




Carta 4: Indeks Pembuatan Mengikut Industri Berorientasikan Eksport dan Domestik, Malaysia, Julai 2024 - Julai 2025



Carta 5: Pembuatan Berorientasikan Eksport Mengikut Kumpulan, Malaysia, Jun 2025 dan Julai 2025



Carta 6: Pembuatan Berorientasikan Domestik Mengikut Kumpulan, Malaysia, Jun 2025 dan Julai 2025



Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAAN MALAYSIA
11 SEPTEMBER 2025